

Incumbensa Tenchio concernent il mantegniment da champs da classa, d'emnas da project e d'excursiuns en las scolas obligatorias dal chantun Grischun

L'art. 19 da la constituziun federala garantescha il dretg d'ina instrucziun suffizienta e gratuita da scola fundametal. Sin basa da l'art. 19 da la constituziun federala po mintga uffant e mintga giuvenil fin e cun il stgalim secundar I far valair in dretg d'ina instrucziun gratuita da scola fundametal, quai che signifitga a medem temp in dretg d'ina prestaziun statala positiva en il sector da furmazion. Quest dretg cumpiglia tut ils meds necessaris che servan directamain a l'intent da l'instrucziun, cunzunt er ils meds d'instrucziun correspondents ed il material da scola respectiv. Tenor la giurisdicziun dal tribunal federal dastgan contribuziuns als custs d'alimentaziun sco er da transport e d'alloschi en champs da classa e sin excursiuns vegnir incassadas dals geniturs mo, sche «talas occurrenzas tutgan tar l'instrucziun da scola fundametal necessaria», che sto en quest cas dentant succeder gratuitamain tenor la norma numnada. Sch'ins parta dal fatg che tut ils meds necessaris che servan directamain a l'intent da l'instrucziun ston vegnir mess a disposiziun gratuitamain, cumpiglia quai er expensas per excursiuns e per champs, sche la participaziun è obligatoria.

En sia sentenza dals 7 da december 2017 (2C_206/2016) ha il tribunal federal decidì ussa che «mo quels custs [dastgian] vegnir mess a quint per quest intent als geniturs, ch'els spargnan tras l'absenza da lur uffants. Els sa restrenschan a l'alimentaziun dals uffants [...]. L'import maximal admissibel dastgass importar tranter 10.– fr. e 16.– fr. per di, tut tenor la vegliadetgna da l'uffant [...]» (consideraziun 3.1.3.). Sut l'aspect da questas explicaziuns ha il tribunal federal aboli en la sentenza numnada ina norma legala dal chantun Turgovia, tenor la quala «contribuziuns pon vegnir incassadas per viadis da classes, per excursiuns e per champs sco er per autras occurrenzas obligatorias [...]».

Tenor l'art. 15 lit. d da la lescha da scola dal chantun Grischun pon vegnir incassadas «contribuziuns adequatas» «da las scolaras e dals scolars respectivamain da las persunas cun la pussanza dals geniturs», en spezial per «viadis da scola, excursiuns sco er champs da classa».

Tras la sentenza numnada dastgan las scolas incassar a partir d'immediat maximalmain 16.– fr. per uffant resp. per giuvenil e per di per viadis da scola, per excursiuns sco er per champs da classa obligatorios. Sut quest aspect na poi betg pli vegnir quinta cun la libra voluntad da tut ils geniturs d'ina classa da pagar dapli, perquai ch'il dretg d'ina instrucziun gratuita da scola fundametal vegniss uschiglio violà. En cas ch'il sustegn statal per talas occurrenzas na vegn betg garantì autramain, exista pli navant il privel real che las scolas vegnian a stritgar en l'avegnir pli e pli savens talas occurrenzas, ch'èn impurtantas per il svilup da cumpetenzas culturalas e socialas, ma er per il spiert da classa.

Sut quest aspect incumbenseschan las sutsegnadras ed ils sutsegnaders la regenza da suttaimetter al cussegl grond entaifer maximalmain dus onns suenter l'acceptaziun da questa incumbensa in rapport ed ina proposta davart las mesiras (eventualmain er legislativas) che la regenza resp. il cussegl grond ha l'intenziun da prender per garantir che viadis da scola, excursiuns sco er champs da classa ed emnas da project obligatorios vegnian cuntinuads en l'avegnir sco en lur furmas d'enfin ussa, senza ch'i stoppian vegnir incassadas dals geniturs contribuziuns che surpassan las contribuziuns da la sentenza dal tribunal federal numnada.

Cuira, ils 13 da favrer 2018

Tenchio, Locher Benguerel, Pedrini, Albertin, Atanes, Baselgia-Brunner, Berther (Mustér), Blumenthal, Bondolfi, Brandenburger, Bucher-Brini, Burkhardt, Caduff, Cahenzli-Philipp, Caluori, Casanova (Glion), Casutt-Derungs, Cavegn, Caviezel (Cuira), Caviezel (Tavau Clavadel), Crameri, Danuser, Darms-Landolt, Della Vedova, Deplazes, Dermont, Dosch, Fasani, Felix (Scuol), Florin-Caluori, Foffa, Holzinger-Loretz, Jaag, Jeker, Joos, Kollegger, Kunfermann, Mani-Heldstab, Märchy-Caduff, Michael (Donat), Monigatti, Nay, Niederer, Niggli-Mathis (Grüsch), Noi-Togni, Papa, Perl, Peyer, Pfenninger, Pult, Salis, Sax, Schneider, Steiger, Thomann-Frank, Thöny, Tomaschett (Breil), Tomaschett-Berther (Trun), Vetsch (Pragg-Jenaz), von Ballmoos, Widmer-Spreiter, Zanetti, Berther (Segnas), Gugelmann, Lombardi, Stäbler